

SANTIAGO

Tiya Huesësicohua'ini Santiago Toyase'e

¹ Yë'ë Santiago, Maija'quëre cui'ne Ëjaë Jesucristore necaiquëpi pëpayë, Israel doce tsëcapëa acohua'ipi jai hue'ña hua huesëni pa'icohua'ire.

Maija'quë Ta'ñe Asayere Isiye

² Maija'quë do'ijë, jaiye ai yo'oyepi cui'ne co'aye äayepi mësaruna ti'a maca sihuajë'ë.

³ Mësarupi tsoe asayë, ja ai yo'oyepi cui'ne co'aye äayepi mësarupa'ire paji cuasayere neñañe a'ë. Jaje pa'ina, ja neñañepi quëcocohua'i pa'iyere neji.

⁴ Nequëna, quëcosicohua'i pa'ijë nuñe pa'icohua'i cui'ne carase'e peocohua'irepa de'oye pa'iyë.

⁵ Mësarupa'icohua'ipi ta'ñe cuasajë yo'oyere carasicohua'i pani sejë'ë, Maija'quëni. Seto Maija'quëpi isija'quë api, ta'ñe cuasajë yo'oyere. Maija'quë cato si'aohua'ire ta'tëpo ti peoyerepa cui'ne ti ëseye peoyerepa isiquë api.

⁶ Jaje pa'iquëta'are se'ne pa'iji, isire paja'quë api cuasajë ti jëa coeye peoyerepa. Jëa coequë cato jai jaira tutupi ju'aquëna, co'poco ñese sani cui'naopi co'ye daio yo'oyeje pa'i api.

⁷ Jaje pa'i cato ina Maija'quë isija'quë api cuasama'ë pa'ijë'ë,

⁸ iye mu'se yeque cuasasiquëpi ñamina'a yequere cuasaquëpi, ocue pa'i macarepa pa'ima'quë cato.

⁹ Maija'quë do'iquëre teaye pa'ini Maija'quëpi jerepa pa'ire necaina, asaquë sihuaye pa'iji.

10 Cui'neje jaiye co'amaña paquëni Maija'quëpi teaye pa'ire necaina, asaquë sihuaye pa'iji. Jaiye co'amaña paquë cato taya jorohuë jumuse'eje pa'i api, tsoe quëcoye peoquë api.

11 Jaje pa'ina, jaiye paquëpi i cuasaquë yo'ora'ase'ere jeoni esa ju'iquë api, jorohuë maca jumusico airepa ësë ëoquëna, cuëneni de'oye ña cuañoñe carajaini me'meni tomeñeje pa'ye.

Neñañe Cui'ne Co'aye Nëiñe

12 Neñañere quëcoquë taima'quëpi sihuaquë api. Jaje pa'ina, neña tējisi maca ti pa'i marore isi cuañoja'quë api, Maija'quëre oicohua'ire isisi'i ca nëose'ere. Ja do'ire sihuaquë api.

13 Mësaru aquëpi co'ayere yo'o ëaye nëiñe pa'ito cuasama'ë pa'ijë'ë, Maija'quëpi co'aye yo'o ëaye nëiñe neji, cajë. Maija'quë cato co'aye yo'o ëaye nëiñe asama'quë api. Cui'ne paipi co'ayere yo'ojajë caquë co'ayere yo'o ëaye nëiñe nema'quë api.

14 Pai cato johua'ipi co'ayere yë do'ire johua'i yëyepi quërë saquëna, co'aye yo'oyena taicohua'i a'ë.

15 Pai cuasayepi, pai co'ayere yëyepi tsi ëtapëje pa'io de'oni tayo yo'oyere joyoyeje pa'ye etoco. Etona, tayo yo'oyepi ai de'o huesëni yureta'a juni huesëyere joyoyeje pa'ye neco.

16 Coso cuaño'ma'pë pa'ijë'ë, Maija'quë do'ijë maña.

17 Si'aye maire de'oyerepa isise'e cato ma'tëmopi Maija'quë isise'e a'ë. Ja isiquë cato si'aye ma'tëmo miacohua'ire de'huasiquë api, tiñe pa'i ponëma'quë api, cui'ne si'a tëcahuëa tëto saina, cui'neje pa'iquë api.

18 Ise'e te'li jaje yo'osi'i cuasani maire nuñerepa coca quëayere asani sehuojëna, pa'iyere isipi, maipi du'ru macarepa quëise'eje pa'iohua'i huajë sëcapë huëocohua'i pa'ijajë caquë.

Nuñerepa Pa'iyë

19 Jaje pa'ina, Maija'quë do'ijë maña. Si'aohua'i mësarü cui'ñasicohua'ire papi yecohua'i cayere esa asajë'ë. Jaje pa'iquëta'are coca cayere esarepa cama'pë pa'ijë'ë. Cui'ne esa pëtitema'pë pa'ijë'ë.

20 Pëtitesiquë cato Maija'quë nuñerepa yo'oyere yo'oma'ë pa'iji.

21 Jaje pa'iyë sëte si'si yo'oye pa'iyë cui'ne jaiye co'ayepi mësarute timë huesoni pa'iyere jeocojë'ë. Jeoconi teaye pa'iohua'i maña'ë cuasajë de'o coca mësarü joñoana tase'ere pajë'ë. Ja coca cato mësarü joñoa huaso tutu paye a'ë.

22 Maija'quë coca asani iti cayeje pa'ye neñe pa'iji. Nema'pë coa Maija'quë cocase'e asajë pa'ini co'ye coso cuañosicohua'i pa'iyë.

23-24 Jaje pa'ina, Maija'quë coca quëayese'e asaquëpi iti asase'eje pa'ye yo'oma'quë cato tsña de'huana me pa'i a'ni caquë i tsia ñani se ponëni sai tsoe huñëyeni me pa'i pate'ni cuasayeje pa'i api.

25 Jaje pa'iquëta'are nuñerepa pa'icohua'ire cui'ne tsea cuañoma'cohua'ire ne cocare asani i asase'ere huñëyema'quëpi iti cuañëñere ocue pa'i macarepa yo'o ti'acquë pa'iquëpi sihuaja'quë api, i yo'oyere.

26 Maija'quëre ti'asi'i caquë yo'oquëre pa'ë cuasaquëpi i tsemeñore nau nëcoma'quë pani

ija'a co'ye cosoji. Cosoquëna, i Maija'quëre tì'asi'i caquë yo'oyepi ti cōcai ma'ñe pa'iji.

²⁷ Jaje pa'ina, Maija'quë pai nuñerepa pa'iye cato iye a'ë: yëhuiohua'ire cōcaiye, hual'jeohua'i ai yo'ojëna, cōcaiye, cui'ne iye yeja si'si yo'oyere pu'pema'cohua'irepa pa'iye a'ë.

2

Si'a Yë'quë Maca Yo'oyere Ye'yaye

¹ Mësaruru Maija'quë do'ijëpi mai de'o Èjaëre pare Jesucristore sehuocohua'ipi paire sahuajë te'ohua'ise'ere de'oye yo'oma'pë pa'ijë'ë.

²⁻³ Jaje pa'ina, yeque mësaruru tsi'si sitona datì'ñe pa'i api, te'e jai do'i curi ju'i ca'huaro moñore ju'iquëpi, jai do'i cañare suñasiquëpi daina, cui'ne yequëje curi peoquë teaye pa'ije ai ju'i care ju'i datì'ñe pa'i api. Daina, mësarupi cayë, du'ru daiquëre de'o caña ju'iquëre: “Da ja'rujë'ë, ico de'o ñu'i saihuëna.” Jaje cajëta'a yequëni co'amaña peoquëni teaye pa'ini cayë: “më'ë cato ja macare nëcaquë ñajë'ë. Panita'a cayë peo yejana ja'runi ñu'i ñajë'ë.”

⁴ Jaje yo'oni tsoe pai yo'oyere ñaquë ca tëji ëjaëje pa'i de'ohuë. De'oni co'aye cuasayepi sa'ñe mësarujä'a sahuajë yo'oyë.

⁵ Yë'ë yëcohua'irepa Maija'quë do'ijë iyere asajë'ë: Maija'quëpi iye yeja co'amaña peocohua'ire sahuani i tsecohua'ire nepi. Jaohua'ipi jaiye co'amaña payeje pa'ye Maija'quë pa'ire paji cuasayere pajë cui'ne ite oicohua'ire isisi'i ca nëosi co'amañare pajajë caquë.

6 Jaje pa'iquëta'are mësarupi co'amaña peocohua'ire teaye pa'iohua'ire co'aye yo'oyë. ¿Jaiye co'amaña pacohua'i pa'i ma'ñe mësaru ñato mësarute tea ju'iñeje yo'ojë pai ëjaohua'i quë'rona quërë sacohua'i?

7 Cui'ne jaohua'ipi yëquë mësarute de'o hue'yosi mamirepa Jesure co'aye sañope cacohua'i a'ë.

8 Mësarupi Maija'quë coca cuañese'eje pa'ye m'ë quëno maca pa'iquëre oijë'ë, m'ëja'a co'ye oiyeje pa'ye case'ere si'a yë'quë maca yo'o t̄'ani nuñerepa de'oye yo'oyë.

9 Jaje pa'iquëta'are mësarupi paire sahuajë te'ohua'ise'ere de'oye yo'ocohua'i pani co'aye yo'oyë, Maija'quë cuañese'eje pa'ye yo'oma'do'ire.

10 Jaje pa'ina, te'i paipi iye cuañese'ere si'aye de'oye yo'oquëta'a te'o cuañese'ere tayosiquë pani tsoe si'aye tayosiquë pa'iji.

11 Jaje pa'ina, jare ipi Maija'quëpi capi: “Yequë ëmëre, panita'a nomiore yo'oma'pë pa'ijë'ë, huejasicohua'i.” Cui'ne capi: “Paire huani jeoma'pë pa'ijë'ë.” Jaje case'ere asani yequë nomiore, panita'a ëmëre yo'oma'cohua'ipi ja yë'ta'a paire huani jeocohua'i pani tsoe cuañese'ere sehuoma'quë ponëpi.

12 Mësaru si'aye yo'ose'e iñoñe pa'iji, Cristo yëyere yo'oye panita'a co'ayere. Jaje pa'ina, de'hua ñajë'ë, mësaru cuasaye cui'ne neñe.

13 Ai yo'ocohua'ire oima'pë pa'isicohua'ire cato oiye peosipi yecohua'i oisicohua'ise'e de'oye t̄'aja'cohua'i a'ë, i Maija'quë pai yo'ose'eje pa'ye ñaquë de'huasipi.

Nema'pë Cocase'e Caye Co'aji

14 Maija'quë do'ijë Maija'quëre pa'iji cuasaquë a'ë. ¿Caquëta'a ja yë'ta'a nese'e ti peoquëre iquere cōcaiquë'ni, i cuasaye? ¿Jaje pa'ire i cuasase'epi ite huasoye pa'iquë?

15 Cañu'u, Maija'quë do'iquëni, panita'a Maija'quë do'iconi caña cui'ne mu'se ai ja'ñe caraquëna.

16 Mësaru aquëpi caji: “Señaquë de'oye pa'ijë'ë. Ca'nequë cui'ne si'aye më'ë yëye ai pa'ijë'ë.” Jaje caquëta'a ti isiye paji, ite carayere. ¿Iquere jaje pa'ito coca cōcaiquë'ni?

17 Jaje pa'ina, ju'isi co'amañaje pa'ye a'ë, Maija'quë pa'iji cuasayepi coa pa'ini, nese'epi peoto.

18 Te'i paipi ca'ñe pa'i api, ñeje: “De'oji, më'ë cato Maija'quë pa'iji cuasayese'e payë, nese'e peoquëpi. Jaje pa'iquëta'are yë'ë cato nese'ere payë.” Jaje pa'ina, yure yë'ëre iñojë'ë, më'ë Maija'quëre pa'iji cuasayere nese'e peoyepi. Yë'ëpi më'ëre iñosi'i, Maija'quë pa'iji cuasayepi yë'ë nese'ere.

19 Më'ë Maija'quëre te'i pa'iji cuasaquë pa'iye ai de'oji. Jaje cuasani më'ë tayoma'ë pa'iyë. Jaje pa'iquëta'are huatlohua'ijë cui'ne cuasayë. Cuasajë ca'rajë tsasijë pa'iyë.

20 Jaje pa'ina, Maija'quëre pa'iji cuasajëta'a nema'pë pa'ito ju'isi co'amaña pa'iji, do'i peoye cuasayepi. Jaje pa'ina, ña sëtajë'ë, huesë pa'ima'ë pa'ija'quë.

21 Ñajë'ë, mai aire Abrahamre Maija'quëpi nuñe pa'iquëre ca huesopi, i mamaquë Isaacre huani jëosi'i caquë yo'osi do'ire.

²² Jaje pa'ina, mē'ë ñañë, Abraham i yo'ose'epi Maija'quë pa'iji cuasayere iñose'e. Jaje yo'oquëna, Maija'quë pa'iji cuasayepi coa yo'o jujase'e peoye etapi.

²³ Jaje yo'oquëna, Maija'quë coca toyase'e cayepi ti'api: “Abrahampi Maija'quëre pa'ire paji cuasa do'ire Maija'quëpi ite nuñe pa'iquëre pare ca huesopi.” Jaje pa'ina, Maija'quë cajeire hue'yosiquë paji'i, Abraham.

²⁴ Jaje pa'ina, mësaru yure ñañë, Maija'quë pa'iji cuasaquë yo'oquëni nuñe pa'iquëre ca huesoye. Coa Maija'quë pa'iji cuasayese'epi nuñe pa'iquë ca hueso cuañoñe peoji.

²⁵ Jaje pa'ina, Rahab co'a nomiore Maija'quëpi nuñe pa'icore ca huesopi, Josué jëjo saosicohua'ire pëaja'to isico cui'ne yequë ma'aja'a yahue jëjo saosi do'ire.

²⁶ Jaje pa'ina, paipi joyore peoquë pani tsoe ju'isiquë pa'iji. Jaje pa'ye cui'ne Maija'quë pa'iji cuasayepi yo'oye peoto ju'ise'epi pa'iji.

3

Cayere Ye'yaye

¹ De'oji, Maija'quë do'ijë mësarupi tsoe asacohua'i a'ë, yecohua'ire se ye'yacohua'ipi jerepa iohua'i yo'ose'e ña de'hua cuaño ja'ñe pa'iyë. Jaje pa'i do'ire mësaru acohua'ipi jai pairepa pa'ima'pë pa'ijë'ë, yecohua'ire se ye'yacohua'i.

² Si'ahua'i tayocohua'ise'e pa'iyë. Jaje pa'iquëta'are te'i paipi i coca cayere ti tayoma'quë pani nuñe pa'iquëre papi jaje pa'i pani, si'aye i pa'iyë nuñerepa ñaquë pa'iquë api.

³ Mai cuañeñe caballopi de'oye sehuocaijaquë cajë yë'opona quëna tarapëre jua nëocohua'i a'ë. Jajë neni yureta'a si'aëre de'oye po'nejë sacohua'i a'ë.

⁴ Ñajë'ë, cui'ne jai yohuë yo'oyere. Ai tutu jëayerepa ju'aquëta'are iti tayoco a'ricona iti tay-oquëpi po'nequëna, i yë hue'ñana saicoa.

⁵ Jajë pa'ye mai tsemeñoje a'rico macata'a jai co'amañare cacao. Jajë pa'iopi a'ri toa macata'a jai airo tsëni ëoyeje pa'yerepa yo'ocoa.

⁶ Jajë pa'ina, tsemeño cato toaje pa'io, co'aye ne tuture timësicoa. Jajë pa'iopi mai capëre pa'io si'a capë co'aye neñe pa'iji, cui'ne si'a mai pa'i ma'aje co'a de'huacoa, mëna tutupi ïoni pa'i do'ire.

⁷ Iye yeja pa'icohua'ire nëicohua'ire, pi'are, añaohua'ire, cui'ne jai tsiaya pa'icohua'ireje, si'aye paipi tseani de'oye ye'yacohua'i a'ë.

⁸ Jajë pa'iquëta'are tsemeño cato ye'ya ti'añe peocoa, nau nëco ti'añe peocoa. Co'acoa. Tsïmaoje pa'iopi si'aye co'a de'huayere timësicoa.

⁹ Jajë pa'ina, iopi Maija'quëre de'oquëre pa'ni cajë sihuajë, cui'ne jare iopi paireje co'acohua'i a'ë cayë, Maija'quëpi ije pa'iohua'ire de'huasicohua'ireje.

¹⁰ Jare iti yë'opopi etaji, de'oye cacaiye, cui'ne yecohua'ire co'aye cayeje. Jajë pa'i ma'ñe a'ë, Maija'quë do'ijë, jajë yo'oye ai co'aji.

¹¹ Te'e oco cojeja'a de'o oco etacona, sëje ocoje cui'na etama'coa.

¹² Maija'quë do'ijë, mësarü ñato ¿Higuerapi hui'yape ne care quëiñe pa'iquë, panita'a cuiya'ipi higuera care quëiñe pa'iquë? Jajë pa'ina, ti peoji, te'e oco cojeja'a de'o oco cui'ne asi oco etaye.

Maija'quë Ta'ñe Asaye Isiye

¹³ Jaje pa'ito, mësaru aquëpi ta'ñe pa'ipi asa ti'asiquë pani iyere i de'oye yo'oquë pa'iyepi cui'ne ja ta'ñe asayepi teaye pa'ire nequëna, nesi co'amañare iñoja'quë.

¹⁴ Jaje pa'iquëta'are mësaru joyore yecohua'i payere ëa ñajë pëiñepi cui'ne ai jerepa pasi'i cuasajë yo'oyepi pa'ina, ta'ñe cuasayë caye cato coa cosoye a'ë, cui'ne ti ta'ñe asayere pare coa cayeje pa'ye neñe a'ë.

¹⁵ Jaje pa'ye pa'ima'coa, Maija'quë ta'ñe asayerepa. Ja asase'e cato iye yeja pa'i cuasani huëose'e a'ë cui'ne pa'i capë yëyepi huëose'e a'ë, cui'ne huati huëose'e a'ë.

¹⁶ Jaje pa'ina, yecohua'i payere ëa ñajë pëiñepi cui'ne ai jerepa pa'i pasi'i cuasayepi pa'ito si'aye ne tiya saose'eje pa'yepi pa'iji, coa si'aye co'ayere yo'oyepi.

¹⁷ Jaje pa'iquëta'are Maija'quë ta'ñe asaye isiye cato co'ayena co'me ma'ñe a'ë. Jaje pa'ina, jo'cua pa'iyë, dahuëre pa'iyë, yecohua'i cuasayere meñe ñañe peoye pa'iyë, yecohua'ire teaye ñani coçaiye, jaiye de'o co'amañare neñe, si'a yë'quë maca si'aohua'ire yo'oye, cui'ne nuñerepa pa'icohua'ire neñe a'ë.

¹⁸ Jaje pa'ina, jo'cua de'oye pa'ijajë cajë yo'ocohua'i cato jo'cua de'oye pa'i ja'ñere neñë. Ja yo'ojëna, tase'e mëani quëiñeje pa'ye quëquëna, nuñerepa yo'oyere tēja'cohua'i a'ë.

4

Iye Yeja Ayere Ëa Ñañe

¹ ¿Jeropi daquë'ni, sa'ñe huajo huaiye, cui'ne mësaruja'a sa'ñe pëti coca caye? Ja cato mësaru sa'nahuëpi etapi, co'aye yo'o ëaye nëiñepi mësaru sa'nahuë uihuaquë pa'iyepi.

² Jaje pa'ina, mësaru yëyere tì'ama'pë pa'i do'ire yecohua'i payere ëa ñajë, huani jëojë yo'ojë, mësaru yëyere tì'añu'u cajë yo'ojë uihuayë, mësaru. Mësaru yëye tì'ama'pë pa'iyë. Maija'quëni isijë'ë cajë sema' do'ire.

³ Jaje pa'ina, mësarupi seni isi cuañoñe pañë, mësaru co'aye yëyere yo'ojë nejañu'u cajë se do'ire.

⁴ Nějore pacohua'ipi yequë nomioni yo'ocohua'ijë pa'iohua'i a'ë, mësaru. Huesëye mësaru iye yeja ayere ëa ñajë oicohua'i pani Maija'quëre oima'cohua'i de'ojë, ite sañope yo'ocohua'i pa'iyë. Jaje pa'ina, iye yeja ayere ëa ñajë oicohua'i cato Maija'quë cajeohua'i peoyë, Maija'quëre sañope yo'ocohua'i a'ë.

⁵ Jaje pa'ina, Maire isisi joyopi iye yeja ayere oima'pë pa'ijë'ë, caquë ai oi ësequë ñacaiji, maire. Jaje toyase'e cani coa cama'ë pa'iji, care paji.

⁶ Jaje pa'iquëta'are Diusu maire oi cõcaiquë api. Jaje pa'ina, toyase'e caji: “Maija'quë cato teaye pa'iohua'ini oi cõcaiquë api, jerepa pa'iohua'i a'ë cuasacohua'ire cato cõcaiye paquë api.”

⁷ Maija'quëna mësaru pa'iyë isisicohua'irepa pa'ijë ise'ere necaijë'ë, huati yëyere necaima'pë. Jaje yo'ojëna, ña jujani mësarute jëoni huë'huëjaquë api.

⁸ Maija'quëna tsiojajijë'ë, ipi mësaruna tsiojajia'quëre. Co'aye yo'ocohua'i tëno tojë'ë, mësaru jëñare si'si pa'iyë. Maija'quëre oñu'u cajëta'a iye pa'iyë se oijë yo'ocohua'ipi ja si'si

pa'iye tsoa tojĕ'ë, mësaru joñoare.

⁹ Otare papi oijĕ ai co'a ju'ijĕ'ë, mësaru co'aye yo'ose'ere cuasajĕ. Mësaru sose'epi ota ponĕjaquĕ cui'ne mësaru sihuayepi oiyena ponĕja'quĕ.

¹⁰ Jaje pa'ina, Maija'quĕ ña hue'ñare pana teaye pa'iohua'i de'ojĕ'ë, ipi mësarute jerepa pa'iohua'ire neja'quĕre.

Yequĕ Tayoyere Ñaquĕ Cama'ë Pa'ijĕ'ë

¹¹ Maija'quĕ do'ijĕ, sa'ñe mësaruja'a co'aquĕ api cama'pĕ pa'ijĕ'ë. Jaje pa'ina, Maija'quĕ do'iquĕre co'aquĕ api caquĕ cato cuañese'e cayere co'aji caji, ipi cuañese'e meñe ña ějaĕ de'oni. Jaje pa'ina, mĕ'ĕpi cuañese'e cayere co'aji caquĕ pani ĩti cuañese'ere sehuoma'ë pa'i coa mĕ'ĕja'a co'ye ñani ca tĕji ějaĕje pa'i de'oyĕ.

¹² Te'i pa'iji, cuañese'e paire isiquĕ. Jare ĩ api, tayose'e ñani ca tĕji ějaĕrepa. Cui'ne jare jaĕse'e pa'iji, huasoye paquĕ, cui'ne nejoñe paquĕ. ¿Jaje pa'ito mĕ'ĕ ĩquei macapi mĕ'ĕ cajei tayoye ñarójai caquĕ'ni?

Ñamina'a Pa'i Ja'ñe Huesĕjĕ Caye

¹³ De'oji, yure iyere asajĕ'ë. Yure panita'a ñamina'a ja daripĕna sani jaronate'e ometĕcahuĕ pa'ijĕ co'amaña nejĕ isijĕ curi neñu'u, cacohua'i maña.

¹⁴ Namina'a mësaru pa'i ja'ñe huesĕyĕ. Mësaru cato picoja'a pa'isicota'a peo hue'ña tiya saiyeje pa'iohua'i a'ë.

¹⁵ Jaje pa'ina, mësaru cato ñeje caye pa'iji: “Ējaĕpi yĕna huajĕcohua'i pa'ijĕ iye maña nesi'i panita'a ja yequĕ co'amañaje nesi'i caye pa'iji.”

¹⁶ Jajē pa'iquēta'are mēsaru cato si'a tuturepa cacohua'i a'ē, pa'ire payeje nēina. Si'aye jajē jerepa pa'iohua'ire nēina, tutu caye co'aye a'ē.

¹⁷ Jajē pa'ina, de'oye yo'oye asaquēpi ja yē'ta'a de'oye yo'oma'ē pani tsoe co'aye yo'opi.

5

Jaiye Co'amaña Pacohua'ire Quēaye

¹ Iye jaiye co'amaña pacohua'i asajē'ē. Oijē'ē cui'ne cuijē'ē, mēsaru ai yo'o ja'ñere asa quēqujē.

² Mēsaru jai do'i co'amaña tsoe ja'juse'e a'ē cui'ne de'o ju'i cañaje pu'jupi ani huesose'e a'ē.

³ Mēsaru oro cui'ne curiquēje yoco ne huesēse'e a'ē. Jajē yoco ne huesēyepi iñoji, mēsaru co'aye yo'oyere. Jajē pa'ina, japi mēsaru capēa toa ēoyeje pa'yerepa peo hue'ña ēo huesoja'coa. Mēsaru tēji mu'señare pare jaiye co'amaña de'huani teaye payē.

⁴ Mēsaru tsiña co'amaña necohua'ire saima'pē pa'ise'epi yure mēsarute sañope iñoji. Iñoquēna, Ējaērepa tutu quē'ipi iohua'i nesi do'ire saijē'ē, cayere asapi.

⁵ Iye yeja pa'i maca mēsaru de'o hue'ñare pare pa'ijē si'aye mēsaru yēyere yo'ojē sihuajē paē'ē, duruhuequē hui'yape jujuyeje pa'ye jujuhuē. Jajē pa'ina, yure mēsarute huai mu'seña t'api.

⁶ Mēsarupi huani jeohuē, ti co'aye yo'oma'cohua'ini, co'acohua'i a'ē cajē, mēsarute sañope yo'o tutu ti peocohua'ini.

Yo'o Jujahuē Cama'pē Quēcojē Uteye

⁷ De'oji. Maija'quē do'ijē. Mēsaru cato yo'o jujahuē cama'pē quēcojē utejē'ē, Ējaē dai macaja'a,

tsio taquë je'quë oco tēcahuëare utequë pa'iquë a'ë, ocosi maca tase'epi mēani quēcona tēasi'i caquë.

⁸ Jaje cui'ne mēsarujē quēcojē ocue pa'i macarepa pa'ijē'ë, mai Ējaë daiye t̄i'a tēji do'ire.

⁹ Maija'quë do'ijē mēsarujā'a sa'ñe jaë do'ire ai yo'oyë cajē pēti coca cama'pē pa'ijē'ë, Maija'quëre nejo cuañoñe pañu'u cani. Tsoe caca sa'rore pa'iji Diusu pa'i yo'ose'le ñani ca tēji ējaërepa.

¹⁰ Jaje pa'ina, Maija'quë do'ijē ye'yejē'ë, Maija'quë yēye quēacai do'ire tsoe acohua'i ai yo'ojē quēcose'ere.

¹¹ Ai yo'onije quēcasicohua'ire mai cato cayē: ai sihuacohua'i pa'iyē, jaohua'i cato. Mēsarupi Job ai yo'oquë quēcose'le cui'ne tēji hue'ñana Maija'quë ite cōcaise'e asacohua'i a'ë. Jaje pa'ina, Maija'quë cato, teaye ñani oi cōcaiyepi ini pa'ie sēte cōcaija'quë api.

¹² Maija'quë do'ijē, mēsarū cayepi do'i quē'ye pa'ijaquë cajē Maija'quēna se ca co'ijajijē care payē cama'pē pa'ijē'ë. Jaje pa'ina, nuñerepa cajē'ë, yecohua'i asajēna. “Jaje pa'iji” casicohua'i pani, jare “jaje pa'iji” case'e pa'ijaquë, cui'ne yecohua'i asajēna, “pañē” casicohua'i pani, jare “pañē” case'e pa'ijaquë. Jaje yo'onita'a mēsarū nejo cuañoñe paja'cohua'i a'ë.

Jujucaija'quë Api, Asajē Señe

¹³ Mēsarū aquēpi ai yo'oquë pani Maija'quëre seja'quë, mēsarū aquēpi sihuaquë pani Maija'quëre sihuaquë jējēja'quë.

14 Mēsaru aquēpi ju'iquē pani sehuosicohua'i ějaohua'ini soija'quē, mai Ęjaē mamipi cajē secacaija'cohua'ire, hui'yapepi dojē.

15 Maija'quēpi ju'iquēre jujuja'quē api. Ta'ñe cuasajē seto ju'iquēpi co'yaja'quē api. Co'aye yo'osiquē pa'itojē i co'aye yo'ose'ere sai de'huacaise'e pasipi.

16 Jaje pa'ina, tayo yo'ose'ere pai ñape yecohua'ina se quējē, pai ñape yecohua'ire secacaijē'ē, Maija'quēre si'aohua'i juju cuañosicohua'i pañu'u cajē. Jaje pa'ina, nuñe pa'iquēpi Maija'quēre señe cato ai tutu pa'iji, yecohua'ire cocaiye.

17 Jaje pa'ina, tsoe aquē Maija'quēre quēcaiquē Elías maije pa'ipi ocoma'o pa'ijaco caquē Maija'quēre sequēna, toaso ometēca cui'ne jopo ocoye pao, iye yeja.

18 Pacona, cui'naēpi Maija'quēre ocojaco caquē sequēna, oco ocona cui'naopi, yeja de'oye mēaco de'o.

19-20 Maija'quē do'ijē, mēsaru aquēpi nuñerepa yo'o ma'are hua saquēna, yequēpi, de'o ma'ana cui'naēni ne co'ya coquē pani jutira'siquēni huasoji, cui'ne jaiye i co'aye yo'orojaise'ere sai de'hua cuañoji.

Maija'quë Huajë Ca Nëose'e
New Testament in Secoya (EC:sey:Secoya)

copyright © 2012 Wycliffe Bible Translators, Inc.

Language: Secoya

Translation by: Wycliffe Bible Translators, Inc.

Secoya [sey], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Secoya

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

995e68c5-fe57-54e6-bf8e-0637526d3f7d